

# Pencinta Alam Kedah tentang

UM 24-06-08 M/S 7

ALOR STAR 23 Jun - Cadangan kerajaan Kedah untuk menebang balak di kawasan tadahan terus mendapat bantahan pihak yang khuatir mengenai masa depan alam semulajadi dan sumber air di negeri ini pada masa akan datang.

Terbaru, Persatuan Pencinta Alam Cawangan Kedah membantah sekeras-kerasnya cadangan berkenaan meskipun kerajaan negeri memberi jaminan ia tidak akan menjejaskan alam sekitar dan bekalan air untuk kegunaan pertanian.

Pengerusinya, Phang Fatt Khow berkata, semua pihak tidak boleh merosakkan alam sekitar terutama melibatkan kawasan tadahan kerana jika diusik, ia akan menjejaskan sumber bekalan air untuk jangka masa panjang.

Katanya, pengambilan balak di hutan simpan dengan apa cara sekalipun boleh menyebabkan berlaku hakisan tanah yang akan mencetekkan sungai, sekali gus memendekkan jangka hayatnya.

"Lebih memburukkan keadaan pada masa akan datang, ia dikhuatiri menjejaskan industri pengeluaran padi yang mendapat bekalan air dari empangan yang terlibat ketika negara mahu mencukupkan bekalan makanan untuk penduduk.

"Persatuan berharap kerajaan negeri akan membatalkan cadangan berkenaan," katanya ketika dihubungi *Utusan Malaysia* di sini hari ini.

Beliau mengulas mengenai cadangan kerajaan Kedah yang tetap mahu menebang balak di kawasan tadahan air bagi menjana ekonomi negeri meskipun pelbagai pihak meminta ia dikaji semula.

Hutan Simpanan Hulu Muda, Pedu, Padang Terap, Chebar Besar dan estet hutan kekal Bukit Keramat dan Bukit Saiong merupakan kawasan tadahan air bagi tiga empangan iaitu Pedu, Muda dan Ahning yang turut membekalkan air ke Perlis serta Pulau Pinang.

Fatt Khow berkata, pembalakan di kawasan tadahan air juga akan menjejaskan biodiversiti di hutan simpan terbabit yang kaya dengan flora dan fauna yang belum diusik atau diterokai.

Menurutnya, persatuan itu memahami tujuan cadangan kerajaan Kedah itu adalah untuk menjana sumber pendapatan negeri, tetapi masih ada cara lain yang boleh difikirkan dengan tidak mempertaruhkan masa depan alam sekitar dan sumber bekalan air di negeri ini.

Dalam hal ini, beliau memberi pandangan agar kerajaan negeri mengutip hasil menerusi cukai air dan tanah bagi meningkatkan pendapatan.